



INATSISARTUNI

Partii Inuit
Randi Broberg

UPA 2014/109-1
20.5.2014

**PILLUGU: Kalaallit Nunaata Nunavullu allaffissornikkut politikikkullu
suleqatigiinnerulersinnaanerannut periarfissat pillugit kiisalu
niueqatigiinnerulersinnaanermut periarfissat pillugit nassuiaasiornissamik
Naalakkersuisut peqquneqarnissaannik Inatsisartut aalajangiiffigisassaattut
siunnersuut.**

(Inatsisartunut ilaasortaq Doris Jakobsen, Siumut)

Siunnersuutikkut ujartorneqarpoq, Naalakkersuisut nassuiaasiornissaannik peqquneqarnissaat, sammivigalugit naalackersuinikkut, allaffissornikkut ingerlatsinermi, niueqatigiinnikkullu pisortatigootumik Nunavut qanoq qaninnerusumik suleqatigineqarsinnaaneramik tikkuussaartoqarnissaa - tunngavissaqarnerusumik sukumiinerusumillu eqqartueqqinnissamut aallaavissatut.

Naalakkersuisut akissuteqaamminni erseqqissarpaat, siunnersuut ilalernartinnagu. Naatsumik oqaatigalugu, apeqqutini ilaatigut uani siunnersuutikkut ujartorneqartut, soorlu attavigeqaatigiittarnikkut suleqatigiinnermik inerisaaneq ingerlareermat.

Partii Inuit siunnersuut soqutiginarippartut, imaaliinnarluguli innersuussutigineqartutut unitsiinnarneqarnissaa soqutigisarinatigu.

Isumaqarpugut Inatsisartunut ilaasortat tamarmiusut soqutigissagaat Naalakkersuisuniit suleqatigiiffigineqartutut taakkartorneqartut, Inatsisartunut ilisimatitsissutigineqarsinnaappata;

- suuneri,
- suleqatigiiffigineqartutut taasat sumut killinneri,
- siunissamullu sammisuni, suleqatigiinneq pillugu Naalakkersuisut qanoq takorluuinersut sammiveqarniarnersullu.

Partii Inuit takorloorparput, ilisimatitsinissamik ujartuineq suliassatut annertuuliutaasariaqanngitsoq, immikkullu nukinnik atuisoqarnissaa ujartorneqanngitsoq.

Partii Inuit isumaqarpugut taamatut ilisimatitsinissaq iluatinnaateqartoq, siunissami Inatsisartut aqqutigalugit suleqatigiinnerup qanoq inerisaaviginiarneqarsinnaaneranut immersueqataasussaammat.



INATSIARTUNI

Partii Inuit taama oqaaseqarluta, siunnersuut aappassaaneerpeqannginnermini ataatsimiititamut susassaqartumut ingerlateqqaarneqassasoq innersuussutigaarput, Inatsisartullu ilisimatinneqarnissaat isummerfigeqqullugu.